

## **Adroddiad Cynghorydd Tachwedd 2015**

Hoffwn atgoffa pawb i gymryd rhan yn ymgynghoriad Her Gwynedd ynglŷn a'r toriadau y mae Cyngor Gwynedd yn cael eu gorfodi i wneud oherwydd polisïau ariannol y Torïaid. Gellir llenwi holiadur ar lein <https://www.gwynedd.gov.uk/cy/Cyngor/Dweud-eich-dweud/Her-Gwynedd.aspx> neu fynd i unrhyw lyfrgell i nol copi papur. Mae'r Cyngor yn gofyn i bobl Gwynedd pa wasanaethau fuaswn nhw yn ddiogelu a pha rai sydd yn llai pwysig. Y syniad yw ceisio cael barn y cyhoedd cyn i'r cynghorwyr orfod gwneud penderfyniadau anodd iawn yn y Gwanwyn.

Mae'r Grid Cenedlaethol yn cynnal ail ymgynghoriad am y Peilonau. Manylion i gyd ar [www.cysylltiadgogleddcymru](http://www.cysylltiadgogleddcymru.com) neu yn y Ganolfan Feddygol. Gall olygu mwy o beilonau yn ardal Nant Y Garth <http://www.cysylltiadgogleddcymru.com/>

### **Cyfarfod gan y Grid : Sadwrn, Tachwedd 21, Neuadd Goffa Y Felinheli 10-4 \***

(Adroddiad isod)

- Llwybr Rowen: mae Cyngor Gwynedd yn cyfarfod un o'r tîrfeddianwyr i drafod symud ychydig ar ble mae'r llwybr ar ei dir gyda'r bwriad o allu cychwyn ar y gwaith i wella'r llwybr. Roedden nhw wedi bwriadu gohirio'r gwaith ond llwyddais i'w perswadio fod hwn yn bwysig i'r pentref.
- Llwybr yr arfordir: mae bron pawb o'r tîrfeddianwyr wedi arwyddo cytundebau erbyn hyn fydd yn galluogi'r Cyngor Sir i greu darn newydd o lwybr arfordir Cymru drwy'r Felinheli , y Marina a'r Faenol yn y gwanwyn.
- Parcio : Fel mae pawb yn gwybod, mae prinder manau parcio yn parhau i fod yn broblem fawr yn Felin. Mae'r trafodaethau gyda'r Eglwys yn parhau a'r syniad o greu maes parcio yng nghefn Neuadd yr Eglwys yn cael ei ystyried. Mae Pwyllgor y Plwyf wedi gofyn i'r pensaer Maredudd ap Iestyn am arolwg mesuredig a dyluniadau cychwynnol ar gyfer y prosiect o foderneiddio'r neuadd gan gynnwys yr elfen parcio. Gallai hynny ychwanegu at y llefydd parcio cymunedol sy'n cael eu darparu yn barod gan y Cyngor Cymuned yn eu maes parcio tu ôl i Stryd Bangor. Da gweld hefyd fod perchnogion preifat yn gwneud gwell defnydd o dir preifat tu ôl i Stryd Bangor ar gyfer parcio.
- Casglu at y Ffoaduriaid: Diolch i bawb am eu haelioni tra buom yn casglu eitemau yn Y Felin Sgwrsio cyn eu cludo i Fethesda a Chapel Caersalem Caernarfon ar gyfer eu hanfon mlaen i Calais. Roedd yr ymateb yn wych. Rwyf yn aelod o Ffrindiau Ffoaduriaid Caernarfon fu'n trefnu'r cylch o bobol o gwmpas y Castell mewn gweithred symbolaidd o gefnogaeth. Roedd nifer o bobl Felin yno.
- Llwybr Penrallt : Hyfryd yw gweld y gwaith sydd wedi ei wneud gan Gyngor Gwynedd i wella cyflwr llwybr Penrallt sy'n cychwyn ar waelod allt Pen y Bryn. Dyma lwybr coediog braf ble mae bwtais y gog yn un carped glas yn y gwanwyn. Mae'r llwybr wedi ei adnewyddu mewn dau le sy'n ei gwneud hi'n hawdd iawn i fynd am dro yma bellach.
- Ffair Grefftau Tachwedd 24 Neuadd yr Eglwys 6.30 pm

**\*DIM PEILONAU i BENTIR**

***Gan Y Cynghorydd Sian Gwenllian, Y Felinheli, aelod o'r grŵp ymgyrchu DIM PEILONAU***

Mae'r ymgyrch i beidio cael peilonau ar draws Y Fenai wedi ei hennill gyda'r Grid Cenedlaethol yn dweud y byddan nhw " yn rhoi'r cysylltiad o dan y ddaear."

Ond mae'r Grid yn dweud y byddan nhw'n trosglwyddo'r trydan ar beilonau o 'gompownd' ar y tir mawr i'r is-orsaf yn Pentir. Mae nhw yn bwriadu adeiladu yr hyn maen nhw'n ei alw yn 'compownd pen selio', tuag erw o faint yng nghyffiniau Y Felinheli / Bangor er mwyn newid o gebl tan ddaear i linell uwch ben ar ôl dod o dan Y Fenai.

Mae nhw yn ymgynghori ar hyn tan Rhagfyr 16.

### **Ond pam na all y Grid roi'r ceblau dan y ddaear yr holl ffordd o'r Fenai i Bentir gan osgoi codi yr un peilon newydd yn yr ardal?**

Nid yw hyn yn opsiwn sy'n cael ei gynnig ond mae'n opsiwn fyddai'n cael ei ffafrio gan bobl leol ac mae modd i chi ddweud hynny yn yr ymgynghoriad.

Bydd yr union leoliad sy'n cael ei awgrymu ar gyfer y compownd a llwybr y peilonau o ddiddordeb mawr i bobl sy'n byw yn ardal Nant y Garth ac yn ward Pentir ger Ffordd Caernarfon a'r tiroedd tuag at is-orsaf Pentir ac awgrymaf yn gryf eich bod yn astudio'r dogfennau yn fanwl.

Mae'r Grid yn cynnig tri opsiwn ar gyfer lleoliad y compownd a thri opsiwn ar gyfer y llwybr o beilonau ac fe gewch y manylion ar eu gwefan <http://www.cysylltiadgogleddcymru.com/> neu yn Llyfrgell Bangor a Chanolfan Iechyd Y Felinheli.

Ond wrth gwrs, does dim rhaid derbyn yr un o'r opsiynau sy'n cael eu hargymell! Gallwch wrthod pob opsiwn a dadlau dros roi'r ceblau dan y mor o Wylfa i Lannau Dyfrdwy, a wedyn fyddai dim angen rhoi ceblau dan y ddaear ar draws Môn nag yng Ngwynedd. Dim peilonau!

Cyfarfod gan y Grid : Sadwrn, Tachwedd 21, Neuadd Goffa Y Felinheli 10-4